

Lajčák se sastao sa Radmanovićem



Visoki predstavnik i specijalni predstavnik EU Miroslav Lajčák sastao se danas sa predsjedavajućim Predsjedništva BiH Nebojšom Radmanovićem. Tokom sastanka razgovaralo se o zaključcima sastanka Upravnog odbora Vijeća za provedbu mira, sporazumu iz Pruda i usvajanju državnog budžeta za 2009. Zemlje članice PIC-a su u potpunosti ujedinjene u zahtjevu da se ispuni svih pet ciljeva i dva uslova koje je PIC postavio u februaru. PIC je podržao sporazum iz Pruda koji su potpisala tri stranačka čelnika Tihić, Dodik i Čović. "Pragmatičan pristup i kompromis su jedini put naprijed za BiH. Sada je ključno da se sporazum pretvori u konkretna zakonska rješenja", rekao je visoki predstavnik i specijalni predstavnik EU Lajčák.

Glavni zadatak koji se u ovom trenutku nalazi pred Predsjedništvom je pitanje državnog budžeta za 2009. godinu. VisokipredstavnikispecijalnipredstavnikEUje izrazio zabrinutost zbog mogućnosti da država još jednom neće biti u mogućnosti da dobije budžet prije isteka trenutne budžetske godine, uprkos pravovremenom dogovoru sa Fiskalnim vijećem. Visoki predstavnik i specijalni predstavnik EU poziva članove Predsjedništva i Fiskalnog vijeća da usuglase svoje stavove te naprave dodatni napor kako bi država dobila budžet na vrijeme i u visini sredstava koja su dostatna za ispunjavanje potreba i obaveza.